

# «Engaschi stinau pils interess dalla muntogna»

Di dallas portas aviartas dalla Societad Ovra electrica Lumbrin la sonda vargada

DA HANS HUONDER / ANR

■ **Cun in plaid da cusseglier nazional Martin Candinas, stans d'informaziun, ina grillada, in schatg musical e la pusseivladad da visitar igl implont ha la Societad Ovra electrica Lumbrin commemorau la sonda in'ulteriura part da siu giubileum da 100 onns. En siu plaid festiv ha Candinas era tematisau l'impurtonza dalla forza hydraulica per la Svizra, mo era sco fontauna finanziaria pils cantuns da muntogna e lur vischnancas.** La Societad Ovra electrica Lumbrin che vegn presidiada dapi nov onns da *Gian Derungs*, festivescha uonn il giubileum da 100 onns. Quei ha ella fatg cun differents arranschaments. Il tierz e davos – quel dalla sonda vargada – ei staus in di dallas portas aviartas. Parallelmein ha la societad ediu ina brochura cun sia historia. Il cudisch dat investa alla planisaziun ed al svilup dall'ovra electrica. *Clau Solèr* ha retschercou els archivs e publicau quel cun sustegn d'*Anita Capaul*. Il resultat da quella lavur ei ina survesta fundada dils tiarms dalla Societad Ovra electrica Lumbrin cun documents, fotografias ed anecdotes. Il cudisch ha dil reminent saviu vegnir retrats la sonda a Lumbrin. Sper la pusseivladad da prender investa dall'ovra electrica ei vegniu purschiu la sonda stans d'informaziun, e fatschentas partenarias han orientau davart lur funcziun ed activitad. La Societad da musica Lumbrin ha delectau ils presents avon ch'els vegnien envidai ad ina grillada.

## Spèrt da pionier

«Vus Lumerinas e Lumerins, Lumnezianas e Lumnezians, astgeis esser loschs da vossa Societad Ovra electrica Lumbrin, dil giubileum, dil responsabels, denton era da vos antenats. Tals han giu avon 100 onns in'idea, in spèrt aviart e da pionier, in vast horizon, interess per novaziuns ed innovaziuns, curascha ed iniziativa.» Cun quels plaid ha cusseglier nazional *Martin Candinas* da Rabius inziau siu plaid pil di dallas portas aviartas la sonda. Lumbrin seigi il sulet vitg ella Lumnezia romontscha cun in'atgna ovra electrica, e quei ina che funcziuni e cun ina considerabla valeta: «Segir ha era quella decisiun da restar independents duvrau curascha, ein bein biaras ovras electricas svanidas per differents motivs in mauns grondis ils davos de-

cennis. Beinenqual vischnaunca vegn tgunsch ad admirar la curascha che Lumerinas e Lumerins han giu ed han aunc adina.» La visun e missiun dalla societad d'esser d'avantatg pils clients ed il generaleesser, da porscher prezis favoreivels per l'electricitad als indigens e da porscher plazzas da lavur ella regiun astgien ins admirar.

## Impurtonza dalla forza hydraulica

Rodund 60 pertschien dalla produziun d'electricitad en Svizra deriva oz dalla forza hydraulica. Quella cefra muossi l'immensa impurtonza da quella: «Sche nus risguardain lu aunc il fatg che 22 pertschien dalla produziun dalla forza hydraulica svizra vegn dil Grischun, muossa quei che nies cantun ei in zun impurtont producent d'electricitad en Svizra. Perquei vegnan era varga in tschnavel da tut ils tscheins d'aua dalla Svizra dabien a nies cantun ed a nossas vischnancas. Tochen il 2024 havein nus saviu spindrar il tscheins d'aua actual.» Buca meins che 120 milliuns francs flessegian el cantun e las vischnancas onn per onn en fuorma da tscheins d'aua. «Tals daners duvrein nus aschamein. Gest ellas vischnancas muntagnardas ein quels daners indispensabels. Il cumbat encunter ina reduziun dil tscheins d'aua naven digl onn 2025 vegn denton beingleiti lantschaus, aschia che quei tema vegn era a fatschentar il parlament ils proxims quater onns», puntuescha Candinas.

## Bunas cundiziuns

«In'ulteriura premissa impurtonta per nossas ovras electricas ein bunas cundiziuns per adattaziuns. Gest l'jamna vargada ha il Cussegl federal deciduu che ovras electricas duein stuer prender dameins mesiras d'ambient tier renovaziuns da concessiuns sco tochen dacheu. Cun quei che biaras concessiuns d'ovras electricas existentas ston vegnir renovadas ils proxims decennis ei quella mesira per las regiuns da muntogna da gronda muntada. En connex cun la vischnaunca Lumnezia pertucca quei oravontut las Ovras electricas da Zervreila», di il cusseglier nazional cristiandemocrat. Talas decisiuns positivs a favur dallas regiuns da muntogna, sco era il success cul tscheins d'aua, motiveschien e muossien ch'els muntagnards stoppien s'engaschar stinadamein per lur interess a Berna.



La supraponza dalla societad ensemen cun cusseglier nazional Martin Candinas (tierz da sen.). Da seniester Flurin Capaul, Martin Capaul e Gian Derungs.



La situaziun actuala dalla produziun d'energia procura buca mo per discussiuns sil pli ault nivel politic.

## Ina suga sco motiv

La cronica dalla Societad Ovra electrica Lumbrin tradescha che l'electricitad dil transport da lenna naven da Silgin a Lumbrin ei staus in dils motivs principals per realisar in'atgna ovra electrica. La centrala cun tuttas apparaturas da diriger ei vegnida construida a Mulin. Entochen igl onn 1946 ei sulet la vischnaunca da Lumbrin stada colligiada vid la reit, dapi lu era la vischnaunca da Vrin. Avon exactamein 40 onns ei la centrala nova a Schanau-sut vegnida erigida. «Cun ina nova lingia da pressiu e cun pli bia altezia ha l'atgna produziun saviu vegnir alzada marcantamein», scriva la

societad en sia cronica. La centrala veglia a Mulin survescha dapi lu sco staziun da trafo e mesiraziun, centrala da commando e da repartiziun sco era per l'entira regulaziun dalla reit. Igl onn 1992 ei vegniu installau ina nova e pli moderna turbina cun dapli prestaziun a Schanau-sut, aschia ha l'atgna produziun saviu vegnir augmentada danovamein.

## Era cun fotovoltaica

Dapi igl onn 2011 producescha la societad era electricitad cun siu agen implont fotovoltaic. Quel sesanfla sill'alp Staviaia Vedita. Entochen 1986 ha l'ovra electrica retratg la forza electrica dalla Patwag cun in



Allas interessentas ed als interessents ei sepurschiu la pusseivladad da prender investa dall'infrastructura dall'ovra la sonda vargada.

FOTOS H. HUONDER



La Societad da musica Lumbrin cun siu dirigent Norbert Capeder ha delectau la raspada festiva la sonda sin plaz scola a Lumbrin.

reclama



**Südostschweiz informiert**

Topaktuelle Nachrichten aus Ihrer Region von Montag bis Freitag ab 18 Uhr.

Nur auf TV Südostschweiz



**KAUFE IHR FAHRZEUG**  
Auch für Export und Unfallfahrzeuge  
Wir übernehmen auch Ihr Eintauschfahrzeug.  
081 252 28 29 | 079 772 54 07  
www.auto-aria.ch

## Jamna da chor Musica Vocalis en Lumnezia

Sepresentada ella regiun cun in vast program

■ **(anr/gc) Dapi 2007 ha la Jamna da chor Musica Vocalis Lumnezia liug ella Sentupada a Vignogn. Uonn eis ei stau dils 4–11 d'uost. Duront l'jamna ei vegniu preparau intensivamein in vast program ed alla fin dau plirs concerts. Priu part han 54 cantaduras e cantadurs. Ils biars vegnan si dalla Bassa e zacons era dalla Surselva. Directur musical ei Gieri Spescha.** Avonmiezdi ei mintgamai vegniu exercitau in grond repertori da canzuns, pilpli ovras sacralas. Il venderdis suentermiezdi ha ei dau in concert cun canzuns popularas era per cussadentas e cussadents dil Da casa Val Lumnezia a Vella. Tradiziun han era ils concerts ella regiun. Sonda-sera ha il chor Musica Vocalis embelliu il survetsch divin a s. Gions a Mustér. El ha interpretau la «Missa Ecce quam bonum» da Leo Hassler (1564–1612) e denteren aunc ovras da Haydn, Schütz, Duri Sialm e Carli Scherrer. Suenter il survetsch divin ha il chor delectau cun ina retscha da canzuns, pilpli romontschas. Igl ei stau bi e zun edificont e perquei vegniu quittau cun ferm applaus.

La dumengia ha il chor Musica Vocalis cooperau tier il survetsch divin campester a Plaun Lom sper il lag sur Triel a Vella. Igl ei vegniu cantau la «Messa da Cristus Retg» da Duri Sialm ed aunc composiziuns da Haydn e Schütz. Igl ei stau tschaffont ton neu dil diember da canzuns sacralas e profanas sco digl ambient. Cun quella cooperaziun ei l'Jamna da cant ida a fin. Cantadurs e cantaduras plein tschaffen e perschuasiun – sut l'egida da *Gieri Spescha* – astgan esser satisfats dil prestau e returnar cun in bein sentiment a casa.

## Tgirar contacts culs indigens e lur cultura

Iniziada ei la Jamna Musica Vocalis Lumnezia vegnida 2006 dalla Fundaziun U.W. Linsi, Stäfa. L'empreda Jamna da cant ha giu liug 2007. Menader musical ed artistic era *Willi Derungs*, oriunds da Vignogn ed activs sco dirigent a Berna. Ella publicitad ein quellas jamnas vegnidas enconuscentas sut il num Musica Vocalis e surtut tras ils concerts. Ellas han adina giu liug ella Sentupada (anteriura

casa da scola) a Vignogn. Dapi 2012 ei Gieri Spescha, Vella, menader musical dall'Jamna da cant Musica Vocalis en Lumnezia.

El s'engascha cun dun, gronda premura ed il success semuossa mintgamai tier ils concerts. Tgirau vegn principalmeyn musica sacrala naven dalla renaschientscha tochen al temps dad oz. In

intent dalla fundaziun ei – ultra dil cant – era da promover il contact denter ils indigens ed ils participonts e participontas si dalla Bassa. Quella jamna duei era dar caschun dad emprender d'enconuscher ina cuntrada muntagnarda sco la cultura ed il lungatg romontsch e procurar per in brat cultural cun excursiuns e sentupadas ella regiun.



Il chor ha embelliu il survetsch divin campester a Plaun Lom sper il lag sur Triel (Vella).

FOTO I. SGIER